

四庫全書

集部

欽定四庫全書

龜谿集卷四

宋 沈與求 撰

內制

麻制 批荅 詔

除郭仲荀武泰軍節度使依前侍衛親軍步軍  
都指揮使權主管殿前司公事制

門下勝負者兵家之常將帥莫先於賈勇于奪者國柄  
之大帝王尤厚於植恩眷我閫臣麗于邦典解齋旄而

茲久扈巖陛以彌勤爰因需音式盼渙號具官郭仲荀  
資稟沈毅節槩軒昂風流紹于故家氣畧聞於殊域訓  
齊士卒適程李寬猛之宜保障疆陲合孫吳縱橫之要  
戰閥屢上勲盟孔昭自從朕於艱虞更飭身於忠謹屬  
游騎飲江而南下慮敵人並海而東侵授以偏師扼其  
要路兵勢弗競避地踰一舍之遙物論既騰啓途收六  
纛之峻項名還於裔土旋典司於禁兵謀謨慨然儀觀  
偉甚念世類之祥未艾知功名之志不衰將勵山西之

勁臣遂付黔南之巨鎮周廬徵道總中尉之八屯錫盾  
雕戈復元戎之十乘茲為寵渥庸示眷私於乎伏波遲  
留克成銅柱之畧營平慎重願上金城之圖儻無愧於  
古人蓋有為於當世往復休命益勵壯猶可

賜朱勝非辭免新除右僕射不允批答

朕纘奕世之丕基屬四郊之多壘眷求輔佐期共濟於  
艱虞涉歷歲時久未聞於績效既虛厥位益難其人允  
惟舊德之良宜膺大政之托授之國柄斷自予東再從

廊廟之遊大慰寰區之望而乃露章薦至避寵牢辭彌徇謙撫殊嘆延佇矧卿元功在國隱德及民雅量足以凝遠圖沈機足以斷大事萬方引領冀臻休息之期二相同心克副焦勞之志母留邦渙用穆師瞻

賜席益辭免侍講不允批答

朕惟商之高宗師古建事克致中興逮及光武干戈鞍馬之間亦惟道藝不廢講論復漢中天之統朕心慕焉肆於萬幾之暇他好弗親惟學是嚮躬御經幄延訪儒

臣庶求多聞宏益治道以卿學問之富師友淵源擢居  
勸講之聯俾卒金華之業稽于僉論孰不謂宜奚事謙  
撫過形控避往推所學紬繹而茂明之副朕虛佇卿亦  
與有榮焉

賜參知政事孟庾辭免通議大夫恩命不允詔  
朕以閩越湖湘之間大憝逋誅根連蔓結脇我赤子盜  
弄庫兵宿師連年未克平殄眷然南顧實疚于懷乃輒  
帷幄之臣而總干戈之事卿義形于色慷慨請行揆策

投機指授諸將羣先隨以蕩滅數路為之肅清坐使黎元復見休息論功甚茂盼賞猶輕時惟股肱必識朕意抗章避寵豈所望焉夫謙沖之節雖云可尚令出而寢卿豈不為朝廷惜乎

再賜孟庾辭免不允詔

朕比遣師徒往平寇盜想山川之悠遠爰念懷歸憫臣下之勤勞豈忘勸賞矧我哲輔夙有壯圖入則參與政機謀謨足以決大議出則總提師律精神足以折遐衝

蠹茲嘯聚之羣詎費坐籌之畫指顧而定逋逃一空歌  
秋杜之詩士方休舍變潢池之習民乃奠居廢律肆行  
需章薦至載惟謙抑殊咈眷懷夫位高而志卑固云美  
矣功多者賞厚猶用歎然往其欽承勿復固請

賜新除翰林學士知制誥纂憲禮辭免恩命不

允詔

朕纂承丕圖戡定多難將欲德意志慮鬯達乎斯民蓋  
在號令文章鼓動乎當世翰墨之選茲維艱哉卿學窮

本原文備體要代予述作亦既有年再隸職於卿曹復兼官於辭禁演綸滋久摛藻益工報淮南之書卿其視草而遣矣下山東之詔民將扶杖而聽之肆加即拜之恩示予親擢之意奚為遞避猶徇故常宜副僉諧之言往就久虛之次

賜新除禮部尚書洪擬赴闕詔

卿居列英髦望隆耆父中臺曳履嘗冠從班外屏分符久寬憂顧迺念踐揚之舊豈忘簡記之勤爰錫贊書聿

頒召節虛常伯之席式佇遄歸促舍人之裝應宜夙駕  
賜新知平江府趙鼎辭免不允詔

朕親撫六師肆觀羣后乃眷三吳之都會實為二浙之  
喉襟控扼要衝茲號股肱之郡慰存凋瘵宜得腹心之  
臣鄉節概剛方器量閎達臨事絕回邪之見為政多豈  
弟之稱自初進階皆朕識擢寘之言路論尤切於愛民  
付以事樞志每先於許國退即祠宮之逸荐更歲籥之  
賒執德不回宅心無競是用起從閑適紓朕顧憂念孔

戮立朝見為公卿之皆憚知寬饒治郡必使吏民之不  
欺奚為抗章尚稽就道勿循謙撫之節其承屬任之恩

賜尚書左僕射領江淮荆浙都督諸軍呂頤浩

生日詔

風威翔於北陸方迎朔律之嚴台象耀於中階爰啓高  
門之慶是生賢佐來相朕躬位崇補袞之華日應垂弧  
之吉式盼珍賜往介蕃祺倚毗廊廟之謀孰踰元老戡  
定邦家之難必享長年

賜叙復平海軍承宣使蘭整辭免恩命不允詔  
朕比以乾象示變震惕于懷乃駿發於霈音用導迎於  
善氣肆加羣辟一洗庶辜卿飭身忠勤致位休顯頃從  
羈旅之役還典禁屯之兵宿衛惟恭訓齊甚力偶挂吏  
議頗鐫使名屬號令之布新宜班聯之復舊奚為謙挹  
猶事遜辭往膺湔拭之恩勿忘奮勵之勇

賜張深程唐劉子羽獎諭詔

朕治兵南服屬意西陲眷秦雍之疆歲被烟塵之擾連

巴蜀之阻日聞邊遽之驚念此傷夷痛如焚灼倚注樞  
臣之重摠提師律之嚴雖云堂上之奇兵自能制勝允  
藉幕中之婉畫相與圖全卿起自儒家明於將畧閥閱  
通於禁筦未減頗牧之賢韜鉞贊於廟謨必合孫吳之  
法山川跋涉歲月淹留挫彊敵於方騎賈餘勇而再振  
執訊獲醜斬將搴旗成茲克捷之功繄乃參佐之力算  
計見效嘉歎不忘然念虎狼哮噬之無厭豈勝其忿熊  
羆奮勵而有獲所戒者輕更懷持重之思助成戡難之

烈嗣盼異賞寧限彝章

賜新除慶遠軍節度使充醴泉觀使特封德清

縣開國子食邑五百戶食實封二百戶邢煥

辭免恩命不允詔

朕會朝方岳竣事合宮告宗祀之備成徧敷惠澤念后  
家之流落未啓戚藩頗采彝章誠為闕典自椒塗正長  
秋之位屬翟馭從朔方之行感此傷心居焉累歲推朕  
懷兩宮之意彼豈忘親廣朕加四海之恩茲為駕近爰

設將旄之重肆開帥闈之雄匪朕所私繄國之舊曷形  
遜牘猶避寵名況卿謙厚律身忠謹事上萬里歸于逆  
旅諒險阻之備更五載服于故官亦靖共之足尚孚號  
既發僉言允諧勿復徇於勞謙其往承於茂渥

再賜邢煥辭免不允斷來章詔

朕追考祖宗之舊凡建節旄之雄自非勲德之優用為  
報稱必以宗姻之懿昭其寵榮卿世為德門居有賢譽  
以儒臣之英而識通機秘以后父之貴而志絕豪華熙

事備成惠術偏舉聯長安之戚里所存幾人開慶遠之  
帥藩姑循曩制其往承於異渥母曲徇於牢辭

親征詔

朕猥以寡昧屬茲艱虞迫臣民愛戴之誠續正統於將  
墜痛父兄播遷之難履尊位以何安夙夜以圖策慮並  
用豈不能躬擐甲冑冒烟塵乘將士欲戰之心慰黎  
元厭亂之意然以兩宮萬里一別九年覲迎鑾輶之還  
期遂庭闈之奉故暴虎馮河之怒敵雖逞於兇殘而投

鼠忌器之嫌朕寧甘於屈辱是以卑辭厚幣遣使通和庶殫孝悌之恩必徇哀恫之請至于土地梗絕生齒流離師徒懷暴露之憂閭里起繹騷之歎繇朕不德嗟彼何辜仰懷故國之廟祧至于賣涕俯見中原之父老寧不汗顏比得彊敵之情稍有休兵之議而叛臣劉豫懼禍及身造為事端間諜和好信逆雖之狂詩率羣偷而陸梁借彼援師倚為威勢簽我赤子脇使征行涉地稱兵操戈犯順大逆不道一至於斯警奏既聞神人共憤

猛士在列怒髮上衝以為逆順之理既分勝負之形可見皆願挺身而效死不忍與賊而俱生朕乃下詔總師卜日引道前驅方戒積陰頓開天地鬼神罔不助順將帥輔弼罔不協心今朕此行士氣百倍雖自纂承之後每垂舉錯之方尚念祖宗在天之靈共刷國家累歲之恥殞彼逆黨成此雋功載惟風霜跋履之勤仍蹈鋒鏑戰爭之苦興言及此無所措躬然而能建非常之功必有不次之賞初詔具在朕不食言

賜川陝宣撫處置使司詔

朕紹國丕基遭時多難飭戎車于江左為懷經畧之圖  
列將鉞於關中欲存根本之勢豈虞彊國專逞淫威敵  
勁弗支兵擎未解嗟蒼天之不弔宜悔禍于我家憫赤  
子之無辜重流毒于茲土寡德所致悼心何言賴我股  
肱之臣總護爪牙之任一戰克捷羣醜殲夷王靈由是  
復加士氣於焉再振然念興師累歲轉鬪一方被敵讎  
之係纏寧無論陷之黨思祖宗之涵養豈有背叛之心

憑陵使然蹭蹬至此儻存疑阻殊咈招徠將束身而欲  
歸或懼刑誅之慘比復業而莫處或憂賦役之煩或立  
效而褒賞未加或負才而祿秩未稱疾苦無告愁恨何  
聊仄席以思當饋而歎於是下哀痛之詔布至意以宣  
昭施曠蕩之恩洗庶辜而拭汎邊將士應陷蕃之人  
非抗王師及侵掠入寇者並不得誅殺敵騎馮陵之際  
陷沒州縣官吏將士軍民皆緣事力不能捍禦致有脇  
從或遭驅擄至今困居本土或旅寓遠邊實為殘破無

曰背叛陷蕃之人能立功來歸者仰沁邊帥守保舉申  
宣撫司一面旌擢優賞其次雖未能立功而心在本朝  
有意懷來者各以元舊官職任使兵級弓箭手依舊職  
名收管民兵願歸業者聽其間才力可用特與拔擢或  
有以前罪犯懷疑自危一切原貸或先曾立功未曾推  
賞即特與推賞因陷蕃廢業失所者寬其租賦免其征  
役昨緣道路不通號令壅隔致遠方之民疾苦無所赴  
訴專委宣撫司講究措置並從寬恤遍下諸處官司施

行咨爾有衆咸識朕心各堅奮勵之誠亟臻休息之效  
故茲詔示想宜知悉

親征戒諭州縣詔

朕以逆臣劉豫稱兵南向警奏既聞神人共憤朕不敢  
復蹈往轍為退兵自安之計而重貽江浙赤子流離屠  
戮之禍乃下罪已詔親總六師臨幸江濱督勵將士然  
興師十萬日費千金動衆勞人懼所不免每一念此惻  
然疚懷尚覲監司帥守與夫郡邑小大之臣夙夜究心

體朕此意凡借貸催科有須於衆者毋或縱吏並緣為姦凡盜賊奸宄輒生窺伺者務絕其萌毋令竊發其或乘時搶攘恣無名之斂容奸玩寇失幾察之方至使吾民橫罹困苦有一于此必罰無赦候軍事稍平當遣廷臣循行郡國

招從偽士大夫詔

朕惟靖康兵革之難神器幾墜天命有在屬於眇躬夙夜兢兢罔敢自逸期與爾士大夫共雪大恥還我兩宮

保有黎元永庇中土而彊敵侵軼迫朕一隅叛臣乘時  
盜據京邑使我搢紳淪陷塗炭繇朕不德以至於斯北  
望傷心收涕無所亦惟爾士大夫蒙祖宗休澤服在周  
行其有失身偽廷事非其主顧驅脇使然有不得已者  
朕甚痛之故若張孝純李鄴李儔等內外親族不廢祿  
仕每飭有司常加存恤朕之於爾厚矣爾尚忍忘之耶  
其能洗心易慮束身以歸當復其爵秩待遇如初或為  
奇謀祕畫立功自効迺賜異賞不限典章嗚呼逆順之

理禍福之機昭然甚明要知所擇朕方布大信以示天下言不爾欺有如皦日咸務自省體朕至懷

賜吳玠詔

覽所奏盧法原以疾不起良用盡然已降指揮邵溥權管宣撫司常行細務至於軍旅調發之事疆陲控制之方此乃國家大計朕既委卿獨當一面卿其以身任之惟卿忠存廟社威震羌胡勤勞累年勲伐甚茂使隴蜀之境恃卿以安則朕有長城之託益所倚重卿必深諒

此意自信不疑近報遣兵分道四出秦雍一帶次第來歸備見規撫嘉歎不已夫關河天下之根本朕未嘗一日忘也收還故土撫寧遺黎此所望於卿者顧朕亦安能鬱鬱久居此乎相時觀釁卿宜勉旃比已遣張浚措置荆襄恐有事宜就令報應卿可知之

賜韓世忠詔

覽奏欲依舊留屯淮甸誓與敵人決於一戰已悉朕迫於彊敵越在海隅每慨然有恢復中原之志顧以頻年

事力未振姑鬱鬱於此自去冬敵人深入卿首挫其鋒  
鼓我六師人百其勇既至潛師引遁而卿復率先移屯  
淮甸進取之計恃此為基朕甚嘉之前日恐老小或有  
不便委卿相度今得所奏益見忠誠雖古名將殆無以  
過使朕竦然興歎以謂有臣如此禍難不足平也古人  
有言閫外之事將軍制之今既營屯安便控制得宜卿  
可安置自便勿復拘執至於軍餉等事已令三省施行  
方此酷暑將士良勞行飭使人齋賜夏藥撫問卿並宜

知之

賜張浚詔

覽奏為韓世忠移屯事遽有外祠之請良用慚然卿謀慮精審宜無遺策而世忠遣濟等來固自有意繼遣故至陳義激昂其所設施畧如初議至其曲折方適厥中卿復何疑而有斯請比以亢旱鼎等方求罷政使朕茫然莫知所措已降詔趣卿還朝當體朕懷即日引道勿憚徒御之勞也

賜三省銓擇監司郡守詔

朕惟監司外臺耳目之寄郡守承流宣化惠養吾民其委任重矣間者朝廷輒輕以假人將何以使民聰然聽服朕甚恧焉繼自今其慎選擇勿狃于故常勿牽于私意以累國其已除授人亦銓量而去留之或資序已深屢更此選雖無顯過而才非所宜當處之外祠稍優其祿庶幾稱朕求治責成之意而士無失職之歎仰三省常切遵守

賜張浚詔

比得胡世將奏知卿已過長沙觸熱引途其勤至矣雖  
卿以身任天下之重而自忘其勞然大臣暑行朕心則  
有愧焉湖湘之寇卿到彼指授諸將必能尅日蕩平顧  
朕所慮者前此王瓊輕入失利賊勢益張今漲潦瀰漫  
之際彼方阻固恐有狡謀遣發師徒更宜審細且招且  
捕一舉成功紓此南顧之憂專意北事乃朕指也已令  
趙鼎諭卿卿宜悉之

賜劉光世韓世忠張俊詔

朕自渡江以來志在恢復深惟足食足兵之計夙夜疚懷凡財賦所入未嘗一毫妄費悉用以養兵而已故比年訓練士卒精彊而器械亦皆犀利比之曩昔實不相侔是以去冬敵人之來卒賴卿等極力捍禦致彼遁歸蓋前此所未有也朕甚嘉之然中原未復二聖未還而僭偽之徒方挾彊國之援狡謀日急顧我所以勝之者惟是上下內外合為一家如報私仇乃克有濟儻或

各以其職自分彼此日復一日成功實難卿為國重臣  
安危所繫諒必察此不待朕言今國用空殫民力耗竭  
雖有司鎰銖積累而費出之數日以寢廣苟無以繼何  
以聚人每一念之心常怵惕想卿亦為朕慮及於此也  
至於差辟官屬保明功賞軍須用度之類更在精覈勿  
至泛濫使賞當而爵祿不私用足而資給不匱則存養  
士力漸圖進取朕與卿等同享無窮之利顧不美哉布  
朕此意卿宜悉之

賜李納詔

朕昨總戎車前臨敵壘洎潛師之引遁勞戍役以言還  
惕若艱躬懼茲多難幸求善後之計敢蹈護前之非博  
訪舊臣屢形深詔卿首陳三策適投却敵之機繼上六  
條大闡興邦之略意拳拳而曲折言凜凜而高明有發予  
衷如對卿語此乃卿精忠許國誠節表時雖在燕閒之  
中不忘開濟之事肆披夙蘊因致良規省閱再三嘉歎  
不已至若議和避地之失練兵積粟之方將議改圖共

期底績臨朝願治顧策慮之是資當饋思賢念詰言之  
可想宜從疾置時告嘉猷終藉經綸之才助成戡定之  
烈故茲親筆以示至懷



龜谿集卷四

欽定四庫全書

集部

龜鵠集卷五

六

詳校官左中允臣允塘五珠

主事臣呂雲棟覆勘

總校官編修臣王燕緒

校對官中書臣吳俊

謄錄監生臣楊兆豐

欽定四庫全書

龜谿集卷五

宋 沈與求 撰

內制

詔 物書 口宣 表

內制

詞文 表

賜岳飛詔

比得張浚奏知湖湘之寇悉已肅清紓朕顧憂良用欣  
愜非卿威名冠世忠畧濟時先聲所臨人自信服則何  
以平積年嘯聚之黨於旬朝指顧之間不煩誅夷坐獲

嘉靖使朕恩威兼暢厥功茂焉腹心之患既除進取之圖可議緬思規畫嘉歎不忘然恐招撫之初人懷反側更宜綏輯以安衆情措置得宜彼自馴擾必與卿計之熟矣或有陳請可具奏來

車駕進發賜臨安府詔諭

朕以諸將之兵分屯江上捍禦敵人暴露勞苦今將幸其營壘親撫勞之庶幾戮力一心以安宗社疆事稍定即議回鑾咨爾此邦之人當體朕意

賜劉光世張浚詔

得張浚奏比至太平建康閱眎卿所部軍馬武藝精彊士氣振發他時卻敵決取成功至於紀律嚴明秋毫無擾民旅和會上下安定繇卿訓督所致良用歎嘉故茲親筆獎諭想宜知悉

賜李納詔

朕以大江之西俗輕而悍朔兵之寇無歲無之師旅薦興民益凋瘵肆圖舊弼往鎮臨之卿威名德望聳動一時

風采想聞人自憚服起于閒館作我介藩匪惟指顧之間一變潢池之習先聲所暨諒折遐衝朕之用卿審矣卿宜以安社稷為已任勿間中外勉為朕行不必數有請也故茲親筆詔諭卿其悉之

賜呂頤浩詔

朕以湖湘八州之地西通巴蜀為國上游往連盜區一方騷動比者招輯雖已畧平而民俗剽輕或易生變允藉耆德往鎮撫之乃起卿燕閭之中而屬以方面之事

庶期談笑坐以銷萌慰彼黎元增重形勢而抗章固避  
殊咈于懷惟卿社稷元老身任安危必不以內外為間  
諒應聞命慨然引途故茲親筆詔諭卿宜悉之

賜劉光世詔

覽奏欲赴行在奏事必有為國經理之謀歸以告朕良  
用嘉歎朕意亦欲卿一來緣遣相臣浚往江上眡師行  
日甚近又恐緣此滯留俟浚至彼卿可一面商量或更  
有所見具奏以聞固所望也卿宜悉之

賜交趾郡王李陽煥厯日勅書

朕正位凝命纂聖緒於累朝治厯明時加王正於率土  
眷爾藩服為予世臣適臨改歲之端宜膺頒朔之慶占  
耕期於農扈克謹民功奉貢職於象胥必遵侯度今賜  
卿紹興三年日厯一卷至可領也故茲示諭想宜知悉  
秋冷卿比好否遣書指不多及

賜武泰軍官吏僧道耆壽等示諭勅書

朕以郭仲荀將門華胄帥閩勁臣出則摠護於戎行屢

任爪牙之重入則典司於禁衛見謂腹心之良再扈巖  
廊之居彌肅綵衣之列嘉乃忠節推其勇功肆開屏翰  
之雄盡復節旄之舊逃惟雅俗素服能名及聞廷號之  
盼必盡輿情之望今特授郭仲荀武泰軍節度使依前

云

賜吳玠王彥關師古獎諭勅書

朕乘厯運之中微屬方隅之多故兵塵數起邊候屢驚  
永懷秦雍之區久罹兵革之禍暴骨滿野連城為墟興

言實心引望流涕式資驍銳之將屏此塵氛庶使創殘之民脫於塗炭卿世家隴右氣稟山西據忠憤於胷中燁威移於塞外運奇合變並施九拒之謀鼓勇爭先悉用萬全之畧潛軍一舉逆騎四馳折敵勢於方驕激士心而復振茲為社稷之衛良慰鼓鼙之思然念歲月倭遲風霜偃薄勤勦雖由於爾力咎責實歸於朕躬更奮鷹揚之師益殲蟻附之衆剋復疆土撫定黎甿赤壤之捷累傳功既存於廟祏丹書之誓永固福自及於子孫

各堅乃誠勿忘朕訓

賜朱勝非辭免右僕射恩命不允口宣

卿功存應變德協鎮浮廷號肆盼朝僉允穆宜膺睠意  
往柄宰司

賜郭仲荀辭免特授武泰軍節度使恩命不允  
口宣

卿家傳韜畧世載勲庸忠謹自將簡注惟舊復盼節鉞  
仍侍殿巖往復異恩益圖休烈今賜卿告想宜知悉

賜孟庾辭免進通議大夫不允口宣

卿摠護戎行掃平寇虐襄功未稱避寵奚為其服恩章  
勿形遜牘

賜邢煥除慶遠軍節度使充醴泉觀使辭免恩  
命不允口宣

卿系出儒家恩聯戚里謙恭有守靜慎無譁齋錢既盼  
廷紳允穆往承茂渥勿復牢辭

上太上皇帝表

臣構言籲天迫切久期鑾輶之還閱歲推遷猶闕寢門  
之間想百靈之華衛致萬福之來宜中謝恭惟太上道  
君皇帝陛下道格神明仁霑動植釋位退託雖殊南內  
之居履時艱危未返北征之馭臣尚遲虞侍每積憂思  
民心撫於歸君彌極天旋之望帝命從於與子必諧晨  
省之祈臣無任

上太上皇后表

臣構言慈闡猶阻屢驚歲月之移壽算莫陳每積晨昏

之戀陰知天意密護聖躬

中謝

恭惟太上皇后殿下德

庇六宮恩涵萬宇練衣出笥素存椒掖之規翟馭旋途

應罷瑤池之集臣思深語咽望極涕零富貴不足解憂

致孝當嚴於大養疾痛則必反本祈恩式佇於遄歸臣

無任

代高麗國王王楷表二首

臣某言仲秋漸涼恭惟皇帝陛下聖躬萬福臣某誠瞻  
誠祝頃首頃首竊念臣叨司蕃寄襲箕子之餘風瞻望

宸居效封人之善祝臣無任

臣某言今年六月十七日迪功郎吳敦禮至奉詔書一  
道者使指遄臻訓詞俯逮豈圖疎逖敢冒寵靈中謝恭

惟皇帝陛下出震以應期乘乾而御變非后何戴民咸  
懷于有仁其命維新天亦佑于一德時雖屬於多故日  
可期於太平言念下蕃素陶聖化之屏之翰曾莫效於  
微勞為龍為光乃屢叨於異數頃馳賤介祇述貢儀可  
嗟一葦之航未能汽濟致使小邦之信不獲升聞深自

凌兢莫遑啟處適以遭家之多難又稽繼歲以入朝敢  
期睿明灼見誠悃特講省存之典俾知眷遇之豐恩實  
非常報將安所復禹之績願克紹於先王曰商是常期  
不隳於舊職臣無任

內中祈禱感應改謝道場開啟祝文

伏以官占告異乾象示威妖實自於人興孽匪從於天  
作惕惟眇德肅事沖和荷眷顧於靈虛匿光芒於杳靄  
況撫艱難之運尚懷惴懼之誠庶保祥圖悉回咎證

內中祈禱感應青詞

伏以非德賜圖期副天心之眷妖芒動色致干星象之  
臨深惟謫見之端聿懷銷復之慮忱誠密叩威命潛回  
發精祲於至和還次舍於常度更祈貺施益勵寅恭

冬至御侍已下賀皇帝詞語

伏以一氣潛萌驗羣陰之退聽七日來復推五福之類  
升恭惟皇帝陛下躬履勤勞志成戡定緝熙庶政深得  
損益之宜陟降百工大明消長之分茂對舒長之旦式

膺蕃衍之祥三靈顧歆萬宇寧謐妾叨塵禁侍獲奉宸  
慈測繡縷之初遲騰壽觴而胥抃

表

代賀元會表二首

清臺紀候載臨七始之期路寢頒常丕講三朝之會惠  
均黎獻喜浹寰區中賀竊以輯五瑞於虞廷止稱羣后  
辨九儀於周室爰及諸臣蓋將受萬國之朝因以上四  
方之計欲稽本始宜在端元恭惟皇帝陛下凝命紫清

匹休黃序愛育萬物則仁行如春照臨百官則德進乎  
日故極舟車之所至皆奉琛賚以攸歸乃究皇儀聿宣  
帝澤庭實千品肅正守之臚傳陞戟百重壯周廬之羽  
衛威容備舉物采彰明遂修曠古之闕文以續累朝之  
盛典臣繆當支郡方遠周行目想雲霄猶記鈞天之九  
奏身居湖海阻陪嵩嶽之三呼

法座端臨懋講初元之會禁庭肅設並造大昕之朝折  
俎均慈康衢溢喜中賀竊以六年考五服之制度雖本

周官三朝受萬國之貢珍寶存漢法蓋體一元統始之  
義以識庶邦享上之誠宜在昌期克修令典恭惟皇帝  
陛下紹休累聖席慶叢霄道樞得乎環中德澤施乎方  
外盛禮興樂與三代以同風軌贊奉琛致九州之共貫  
因歸事於寧旅遂辨等於司儀時乘嗣歲之興詔即當  
陽之御陳百寮而贊羣后臚句交傳尊中國而服四夷  
威容兼備臣濫馳使驛久去帝闈稱壽觴之九行想聞  
輶輶閱庭實之千品阻綴鳬趨

代賀收復杭州表

狂寇逋誅馴致入郛之警偏師薄伐亟還按堵之居種類既殲流離悉復中賀竊以東南巨屏吳越舊封在昔割據之初未嘗用武維今休息之久豈復知兵故輕狡之連謀乘安平之弛備稍稽捕逐寢肆跳梁負匱擔囊始依憑於山谷揭竿斬木卒驚犯於潢池比及上聞聿頒中詔憫愚民之冒昧因重使以招徠猶冀竄藏方圖翦滅蠣蟲之痒脫或俟於爬搔雷霆之威顧豈勞於推

折縱於九拒舉以萬全適陳將鉞之嚴已復侯藩之舊  
恭惟皇帝陛下弛張文武出入聖神法日月之照臨體  
春秋之生殺蠹茲姦宄殘我善良欲空烏合之羣肆遣  
鷹揚之旅果憑勝算克濟成功示恩信於一方憚威靈  
於四裔臣繆當支郡實控要塗首興備禦之謀嘗集散  
亡之旅追承嚴召猶敢留行簞食壺漿樂致王師之餉  
鼎臚俎載願賡皇武之歌雖阻預於稱觴亦庶同於擊  
壤

代提舉常平謝到任表

乘使傳之光華曾微報稱奉帝綸之溫厚更辱超踰寵至若驚感深以涕中謝伏念臣受材綿薄植性滯頑結髮讀書粗知於為已彈冠從仕常切於慕君乃忘習俗之是非但守家傳之清白激昂志操黽勉事為斷斷它技之猗無終慚意廣錄錄奇節之未有愈覺心勞頃被誤知驟叨煩使摘山煮海適當寶藏之興足國裕民已見宿儲之備陶冶悉歸於帝力斡旋何數於臣功敢謂

矜憐曲加獎拔就蹣將明之寄俾專盼斂之權原隰所  
經弗改馳驅之舊倉箱既溢第令取予之均退省何人  
輒汚此選茲蓋伏遇皇帝陛下堯仁天大周道砥平恤  
隱逮鰥罔俾一夫之失所裒多益寡遂令萬物之得宜  
欲實德之周施睠微勞而畢錄特捐異寵因勸庶工臣  
敢不肩此一心展其四體鑒覆車之前戒廣蔭樾之深  
恩雖曰涓塵庶可增於高厚譬如草木豈能謝於生成

代謝賜出身表

綴甘泉之班已塵法從賜奉常之第更擬賢科捧溫綺  
之粲然撫微軀而愧甚中謝伏念草茅末族韋布陳人

蚤歷詞場曾無足用之學繼從官牒遽有多取之名恐  
淟汨於俗吏之為故激昂於儒者之事身迷簿領幾負  
平生耳熟絃歌猶驚昨夢忽被龍庭之異曉亟追鴈塔  
之英游禮異詳延恩踰特起服章雖麗恍如脫於白丁  
詔墨未乾喜若登於黃甲何期暮齒乃遂初心此蓋伏  
遇皇帝陛下駕馭英豪撫綏黎庶下訪山林之隱逸旁

咨軒冕之棄遺數路俱收寸長卑錄察臣粗諳事任故  
加以次對之名憐臣稍涉藝文故清其出仕之日臣敢  
不深體至意益恢遠圖考究古人之書講明當世之務  
庶完臣節以報主知

代謝轉官表一首

轉粟千艘曾微異績就官一列忽玷明綸恭承睞獎之  
私采積超踰之愧中謝伏念臣受生艱拙奮跡羈孤讀  
書徒守於陳言初非利已任職僅逃於常憲何以渝人

頃蒙推擇之優薦領輸將之重會當師役方翦寇攘率  
饋餉以周行越江山之回阻服勤戎事蓋分守之當為  
奏凱第功豈寵光之敢覬例加殊賞誤及微勞此蓋伏  
遇皇帝陛下道妙曲成智深旁燭威稜遐暢既空蠅蚋  
之羣褒典嗣頒已徧貔貅之旅乃眷飛芻之力亦疏增  
秩之榮臣敢不益侈帝恩具宣使指循名考實雖未知  
足國之謀宿道嚮方或庶幾報上之節

代賀南郊禮成表三首

泰疇奉祠昭事上帝端門肆赦敷錫庶民恩浹幽明驩  
均溥率中賀竊以天人相與莫尚於郊丘祖宗以來尤  
嚴於禋祀尊迎至景謁款大神蓋將答四海之驩心豈  
特循三歲之故事恭惟皇帝陛下紹休累聖席慶叢霄  
盛德升聞已極和同之妙彌文備舉故忘升降之勞禮  
既洽於精純澤遂疏於優渥臣屢膺煩使阻遠周行肸  
蠻潛通想已瞻於鄉坐福釐旁暨愧莫預於駿奔

泰壇竣事修三歲之親祠解澤流恩宥萬方之多罪凡

居覆憐同極驩呼中賀竊以申陟配之嚴雖云舊典正  
合祀之失蓋自新儀彌文具而孝隆精意昭而福備乃  
施惠術爰及眚災伏惟皇帝陛下德合乾行功循祖武  
丕釐上帝之命志在寅恭永底蒸民之生務存寬大既  
定郊丘之卜肆均海宇之休臣猥以微軀繆當支郡駿  
奔於列阻依天日之光誕告所臨俾霑雲雨之潤

緹室飛灰甫定一陽之卜紫壇升燎載嚴三歲之祠恩  
浹華夷慶均朝野中賀伏以宗祈推本陟配奉先千品

具而禮乃行百神享而福斯降斂時貺施茂對一人之  
休念此眚災誕敷四海之澤豈惟故事實乃殊休恭惟  
皇帝陛下凝命昊天同功烈祖既保定爾遠追歸美之  
言故安樂之克篤守成之志肆及屢豐之候聿修大報  
之儀惠術俯加和聲迭應臣濫塵扈從叨領輸將迹寄  
江湖結望雲之遐想分隨草木霑蒙露之餘滋

代賀明堂宗祀禮成表

寶構宏開肇正合宮之位齋輿夙駕聿修宗祀之儀慶

決人神驩均華夏

中賀

竊以頒朝布政於是

有王者之

堂嚴父配天所以教諸侯之孝

叔自黃帝逮及成周監

二代而併圖順四時而作則考冬官之記炳然制作之

工歌我將之詩允矣威容之盛旋起三雍之議猶存五

府之祠於皇祖宗首啟鴻博參稽六籍將革權時之宜

追考九筵實待重熙之日恭惟皇帝陛下道隆稽古德

懋奉先兼三王損益之文黜諸儒同異之論全謨駿發

鉅典勃興陽曜陰藏拓豐基於廣內天造地設占王氣

於中都茲大饗于先王薦九州之美味肅雖顯相均釐  
已徧於臣鄰涓選休成霈澤遂周於寰宇臣叨從末秩  
逖聽鴻猷搢笏垂紳莫預駿奔之列扣領擊缶但賡歸  
美之音

代賀天寧節表

瑤光呈象錫一人有慶之符火德繼明開萬世無疆之  
福驩聲亘地和氣浹天中賀恭惟皇帝陛下德契分人  
道極妙物用端命于上帝能保惠于庶民雷厲風飛極

號令之鼓舞金聲玉振備條理之始終丕承九廟之休  
茂對三靈之佑會逢良月允邁誕辰四海梯航永奉人  
正之統千官劍佩交騰天保之歌臣屏跡江湖馳心軒  
陛望堯雲之紛郁莫預稱觴祝舜日之舒長唯知擊壤  
代謝侍講表

趨詔江湖還寘論思之列執經帷幄進陪勸講之聯叨  
恩每念於超踰瀝懇靡容於控避威顏密邇感涕縱橫  
中謝臣聞聖主輯稽古之勤實闢政理儒臣共守成之

樂專在藝文故立誦說之官時賜清閒之燕終始典于學庸備多聞之求左右惟其人庶資一德之協況萬世親逢於大聖而羣臣莫望於清光必有異能庶存故事臣學殖浮淺文思淹遲多病早衰久矣寢忘於舊業少徒寡耦介然唯恃於孤忠頃扈屬車之後塵嘗預外廷之末議空糜歲月無補絲毫拜州雖切於拊循去國蓋深於眷戀遽膺召節重歷禁局翱翔玉筭之班紬繹金華之業食殊庭之祠廩併冒新除對延閣之直廬猶驚

昨夢顧寵光之若此嗟報稱之謂何此蓋伏遇皇帝陛下躬攬萬幾心游衆妙文謨武烈治登三代之隆周誥商盤言合六經之懿然猶親御便坐延見邇臣深研上古之書博詢當世之務軫懷遺履輒命賜環臣敢不益戒庸行少酬睿眷盡精極慮顧何以增日月之光擿句分章恐於此窮溝澗之涸

為吏部魏侍郎謝表

奔命造朝會萬乘親巡之所叨恩拜職就七年舊立之

班嘗試可而無功輒辭難而有請俞音終閟感涕空流  
中謝伏念臣章句之學而昧於通方田野之姿而拙於  
任劇昨荷朝廷之過用猥緣場屋之虛名齒髮已凋事  
功奚取念邊塵之倣擾傷國步之艱難方八駿啓塗既  
不獲執干戈而效臣節暨六龍御極又未能扈警蹕而  
贊帝謨愧恥塗顏憂憤切骨比膺迅召即戒疾驅冀殫  
冕冕之思少效拳拳之義雖枕戈待旦每誦斯言然坐  
井觀天了知何補敢謂獎憐之渥亟收流落之餘旋拜

訓詞再貳銓部屬師旅興行之際正入材淹滯之初名  
曰故官事非前日矧茲袁病豈克堪任茲蓋伏遇皇帝  
陛下神聖先知英武大度負扆而朝萬宇更延奕世之  
休折箋以答四夷將靖中原之亂疇咨衆俊宏濟多艱  
凡蒙惟舊之求莫奪已成之命有如臣輩亦玷此恩臣  
敢不黽勉夙宵依附日月著鞭雖晚尚肩勵職之心借  
箸可前期盡報君之策

為魏侍郎謝得官觀表

嬰疾告休自驚累月祈哀引退尚憫餘生再仍延閣之班更食珍祠之廩銜恩僥倖撫事徊徨中謝伏念臣頃

迫東遲久投閒散辦嚴上道起從一節之趨扶憲造朝

顧殫千慮之得而臣孤蹤晚達薄命終窮未施橫草之勞已抱負薪之歎庶期少間或能殉國而捐軀況值多

虞豈忍卧家而避事悼初心而莫遂荷成命之已行滿

盈招蹊轂之災天其或者冒昧拜支離之賜臣猶知之

此蓋伏遇皇帝陛下燁揚天威恢廓皇度憂勤政事講

明興廢之端愛惜人材保全進退之節始從所欲用恤  
其私臣敢不休養暮年規圖後日畝畝不忘之意終戀  
蓋惟溝壑未填之身尚期鞭策

為顏左丞謝賜生日生餼表

綸言溫厚曲記始生品物便蕃特存故事荷雲天之施  
渥知蠖蟻之命輕中謝伏念臣奮身東遲遭世艱棘抵  
龜而決偶階扳附之榮驂乘而行茂聞陪輔之效適局  
劬勞之日更叨錫予之私慶溢庭闈驚傳里巷此蓋伏

遇皇帝陛下英威馭世雄武興邦恢張遠圖首啟腹心  
之密昭示至意獨全體貌之隆故捐此恩以華其老回  
念終身之慕豈廢糜捐興言末路之難唯知感勵

為顏左丞謝賜生日生餼笏記

御府分珍加賞劬勞之日親庭拜覲益光哀朽之年此  
蓋伏遇皇帝陛下獨智沈幾深仁偏愛特盼寵數以勵  
臣鄰謹如慈母之教臣當委微軀而報上

龜谿集卷五

欽定四庫全書

龜谿集卷六

宋 沈與求 撰

表

謝除御史中丞表

一節造朝已玷持書之舊十行錫命遽叨執法之榮危  
悃上陳溫言狎至覲顏就列攬涕知慚中謝臣竊以風

憲之司政事所繫臺綱正則百度舉國論定故羣慝消  
專務抨彈寧容畏忌必也深達治體更練事情本之以

仁厚愛物之誠加之以正直事君之道身任衆怨屹如  
柱砥之鎮頽波言切上心沛若巨魚之縱大壑俾率其  
屬克大厥官伏念臣多病早衰少徒寡與叨蒙異眷祇  
罄孤忠危哉樓子之言將共扶於公道甚矣汲黯之讐  
嘗自觸於駭機一去天墀甫更歲籥召從下澤歸觀清  
光心驚仗馬之鳴初疑昨夢目駭臺烏之集復守故棲  
空貽戶素之譏敢有超遷之望忽傳明命驟躡峻班寵  
過食浮莫遂循牆之避位高責重更深臨谷之憂此蓋

伏遇皇帝陛下自誠而明能哲而惠羣策屈羣力並輯  
謀猷之良公事當公言兼收聽納之美察臣論每專於  
國計憫臣志獨緩於身謀出自親除就加器使臣敢不  
益堅素守仰稱殊私明目達聰方廣求言之路摩頂放  
踵盡是報恩之身

謝賜對衣金帶鞍轡表

衣裳出笥加寶帶之爛然軶軼在庭傳華轄之沃若叨  
光焜耀顧影徘徊中謝伏念臣才不逮中識非致遠念  
光焜耀顧影徘徊

起家之寒甚驚卷髮之班如早對妻孥嘗動王章之泣  
晚懷鄉里寧忘馬援之言頃荷宸慈再紓召節故里靡  
容於懷綏舊班俄俾於乘驄寢冒寵私每踰分願此蓋伏  
遇皇帝陛下仁深約已禮厚好賢蕃飾庶邦不待無衣  
之請命駕馭多士使知有馳之在公特示匪頌以昭暭  
遇臣謹當依附日月黽勉夙宵負赤芾三百之譏偶先  
結綬竭駿馬十駕之力敢後著鞭

謝除吏部尚書兼權翰林學士表

柏臺五院之游屢經冒進蘭省六卿之列首玷超除更  
被詔函兼陪辭禁寵榮併集愧懼交深

中謝

伏念臣涉

學迂疎起家寒瑣寸心許國但知直道而行片言得君

肯借游談之助悼奇節之未有慚他技之猗無祇以孤

忠數叨異數擇笏而賜李絳獨蒙曲誤之知前席而見

賈生每奉清閒之燕念殊恩之難報宜嚴譴之必加豈

謂忽拜明綸驟躋華序從事銓衡之地力已弗勝寓直

翰墨之林才將焉彊靡容俯僂采積戰兢此蓋伏遇皇

帝陛下叡智先知英武大度勤於接下圖宣王復古之功寬以用中得成湯立賢之道矜憐狂直之末躡寘俊髦之先臣敢不外竭罷駕中存丹赤上山濤之啓事何敢不公草陸贊之詔書終憂靡稱

謝兼侍讀表

軒墀載橐備甘泉之近班惟幄執經紹金華之絕業皆極儒臣之選悉繇睿主之知銜恩有加收涕無所中謝伏念臣資材戇甚誦數缺然學者以聖王為師歎清光

之難望春秋乃天子之事懼微言之罕通豈圖申錫贊  
書更侍便坐討論三傳之旨參陪五學之游莫遂循牆  
終宜避席此蓋伏遇皇帝陛下道侔天運德懋日躋左  
右惟其人輯搢紳於燕閒之際終始典於學脫筆削於  
廢錮之餘致誤簡知與叨紬繹而臣丹心獨在華髮半  
空因事獻言雖欲殫千慮之得斷章取義豈能副多聞  
之求區區以還跼蹐而已

謝除職名宮觀表

叨榮帥閫甫回南紀之行養疾祠宮復忝西清之直荷

大恩之委曲撫孤跡之凌兢形影自隨涕洟交溢

中謝

伏念臣家世寒甚質狀眇然不虞朴拙之易危殆至迂

疎而難合祇憑直道屢發狂言每期特立而獨行是致

多仇而少予向紓三組本繇上聖特達之知寢閱九遷

彌處衆人必爭之地了無裨補積有罪愆間蒙賜對於

燕朝數丐投閒於散地迨膺重寄自列初心何敢徇於

身謀誠恐乖於國事既寬威命亟下俞音望蓬萊之昔

游雖云引去指柴桑之舊隱儻遂來歸祿賜尚豐寵名  
益侈此蓋伏遇皇帝陛下皇明並照聖度兼容馭衆得  
官司之宜圖功乘事幾之會憐臣愚有守蓋嘗備腹  
心之臣察臣縹弱無堪不復責爪牙之事故捐異渥以  
佚殘骸臣敢不追悟昨非退安素分魂筑築而去國莫  
效餘忠思翫冕而慕君庶存晚節

賀冬至節表

律隨候應驗一氣之潛萌卦以類通知七日之來復中

賀恭惟皇帝陛下龐恩浹物剛德御時圖回每惜於分

陰恢復靡忘於尺地法宮展案將陳亞歲之儀神筴延  
年必享後天之福臣屏居故里阻預周行測舜日之長  
徒傾葵藿望堯雲之近分隔泥塗

謝知鎮江府到任表

奉祠真館本避寵而投閒試守名邦忽叨恩而任劇已  
布哀矜之詔庶銷愁恨之聲下聽民言皆知上德中謝

伏念臣衰羸多病朴拙少文奮身無半面之交最為孤

立遇主有一言之合亟被深知向塵耳目之司即受腹  
心之託雖觸犯忌諱每恃包容然排擊姦邪多招仇怨  
而臣忠在許國義難徇人迨陞銓總之曹案積顛隣之  
懼稍求散地俄奉俞音一自去於朝班已再更於年所  
形潛窮谷方追麋鹿之游夢入修門空想鷁鸞之侶敢  
圖簡記復玷使令矧此凋殘之餘居然控扼之要江山  
猶昔雖云襟帶之存城郭已非但見丘墟之積志徒策  
勵才豈堪任此蓋伏遇皇帝陛下器使羣才陶成庶類

念臣進繇親擢姑務保全於始終察臣退在自安更令  
揚歷於中外肉骨之恩逾厚糜軀之報益堅誠恐技窮  
敢辭責重謹當奉承德意勞還綠晦之民憑藉威靈和  
輯扞邊之士粗能辦職猶覬乞身

謝除吏部尚書表

擁麾臨郡靡聞治狀之優曳履還朝忽拜召音之迅班  
聯雖舊眷渥彌新中謝伏念臣奮跡孤生受知明主越  
從羈旅之次寘在英游之間六年于茲一節以守犯顏

狂論仰翳全度之容率意妄行頻觸駭機之發頃違表  
著退即丘樊庶少避於澑盈亦苟逃於罪戾恩緣謀帥  
詔使牧民雖公家之利無不為粗識所嚮然軍旅之事  
未之學終媿斯言曾坐席之未溫已賜環之亟下自驚  
衰朽重歷禁嚴此蓋伏遇皇帝陛下信順尚賢聰明稽  
古多士雜遷皆洞照其肺肝羣寇跳梁已陰得其要領  
將開興運並用舊人如臣等夷亦在比數臣敢不激昂  
於事洗滌其衷涉世蹈憂患之途其身已老報君持忠

義之節此志不移

謝除兼侍讀表

召節始頒已冠六卿之列除書繼下亟從五學之游拜  
命便蕃撫躬跔躡中謝竊以顧問之職講讀為榮在漢

褒絕業之功第參陪於貴戚至唐修更侍之令遂專用  
於者儒洪惟本朝遠鑒前代御邇英之便坐延勸學之  
近臣貴德上賢本以示四方之好惡分章擿句又將質  
千載之是非必惟其人庶益於國伏念臣聞道最晚涉

世甚迂頃蒙特達之知頻侍清閒之燕考祖考已行之  
事每獲口陳誦春秋不刊之書終慚膚引矧茲謇訥之  
素加以哀羸之餘復玷克員益難塞責此蓋伏遇皇帝  
陛下道惟天合德與日新能自得師者王豈清光之可  
望智而好問曰聖猶多聞之是求乃緣舊恩而及凡品  
臣敢不勉羞薄技務竭精思收之桑榆心歎東隅之失  
出於涯涘魂驚北海之觀

辭免除叅知政事表

任重人微敢殫危悃恩隆命確未錫俞音更陳迫切之辭仰瀆蓋高之聽中謝伏念臣章句之學拙於濟時田野之資昧於謀國徒以四海至孤之跡曲荷九重特達

之知徧歷高華曾微補發比膺召命復長銓曹方日俟於譴訶遽參陪於機政况風塵之警未息郊壘滋多而宵旰之慮益深朝綱猶紊簡求誤及稱塞愈難伏望皇帝陛下徧察猷為先求望實公回宸渥別授時英雖獨智之有臨宅心奚隱苟衆聽之無咈反汗何嫌

謝除叅知政事表

召還朝著久懷未報之恩擢與政塗忽拜已成之命顧丹悰之屢控念淵聽之莫回寵極而憂感深以懼中謝

伏念臣起家農圃託業詩書寢驚麋鹿之姿進蹣鶴鸞之序落落難合恃直道而靡他皓皓易汚撫危蹤而甚慄每聞九重嘗膽之誓妄發一介嬰鱗之言見謂小忠曲蒙殊獎雖中外之使令莫效而初終之眷遇不衰欲竭微勞敢遺餘力詐意聖神之求舊遽先豪俊而用臣

驟寘廟堂參陪帷幄况四郊多壘之際贊一日萬幾之繁蒐粟練兵適欲靖方隅之亂圖事揆策又將振朝廷之威孰謂薄才能勝重任莫遂循牆之請更深據疾之思勉奉溫言實形慚汗此蓋伏遇皇帝陛下恢張庶政延攬羣才憐臣孤立於時素受腹心之託察臣多關於事庸備股肱之求亟下異除悉從英斷臣敢不依附日月警戒夙宵同寅協恭深懲比德之害砥名礪節上副康功之圖

謝賜牙簡金帶表

使騎星馳懽傳里巷賜奩天降光動搢紳

中謝

伏念臣

卷曲散材拘攣末學少希拄頰迎爽氣於朝來晚厭折

腰揖清風於颯至豈謂羈孤之跡每蒙曲誤之知束帶

以朝久汙近列擇笏而賜嘗拜異恩更緣不次之除復

冒非常之寵便蕃所寄俯偃奚勝此蓋伏遇皇帝陛下

德洽九圍文飾萬象輯康功以綏區夏粲徽數以厚臣

鄰遂致辱庸亦叨華煥臣敢不退循紐約深戒倒持服

映輕裘自足託臨戎之狀制踰文竹固宜堅擊賊之心

謝賜生日羊酒等表

使馭星馳詔函天降寵將厭賜榮賚私庭伏念臣系緒  
寒微技能淺薄親蒙殊獎叨與繁機一節不渝雖每虞  
於顛沛千鍾弗洎終永念於劬勞適紀左門之弧更拜  
上臺之餽藐無足稱慄不自任茲蓋伏遇皇帝陛下隆  
禮養賢至誠接下眷言體貌用為邇列之光式是匪頌  
不廢彝章之渥臣敢不益推朴學深戒素餐責食功於

後圖酬恩何有佩移忠之先訓畢命以之

辭免扈從轉官表

襄典超踰敢傾危悃寵辭敷勉尚嗇俞音中謝伏念臣

猥以薄才誤蒙殊用屬羽書之紛奏扈輶輅以親征協

贊宸謀既乏徒薪之策肅清邊警又無橫草之功蹣進

崇階坐饕異賞雖聖恩之過厚在愚分以難安忝冒何

名人言必至控陳未力天聽莫回再犯雷霆之威更殫

蠻蟻之懼伏望皇帝陛下推仁從欲體道觀能念帷幄

之近聯已為榮耀收絲綸之成命庶免顛隣黨私願之獲伸亦公器之增重

謝扈從轉官表

靈旗電掃克成卻敵之功清蹕天旋爰舉醻勞之典固辭弗獲冒受奚堪中謝竊以逆臣逋誅久寬鉞鉞勍敵借助復動干戈邊遽初聞宸謨已決乘六師之共憤屈萬乘以親征貔貅鼓行蛇豕奔北既獻俘而奏凱宜告廟而策勲臣於其間一無所補猥緣近列濫進崇階此

蓋伏遇皇帝陛下比迹堯仁同符湯勇威加敵國更收  
不殺之恩禮厚臣鄰寧界無名之賞儻因微數用勸羣  
工而臣異懦弗彊迂踈何取修車攻復古之政雖許與  
聞從奉天定難之臣則為忝竊尚圖微效庶答鴻私

謝賜御書車攻詩表

使驥馳騖俯傳天語之溫宸翰騫騰上應奎文之爛光  
生篋笥榮動搢紳中謝伏念臣猥以凡才叨蒙異獎每

奉萬幾之暇數窺一札之工至若採石鼓之遺篇灑銀

鉤之妙蹟因辭見意更踰宵雅之肆三與世作程彌識  
帝書之第一敢圖珍賜遽及孤生此蓋伏遇皇帝陛下  
盛德日新多能天縱將芟夷於大難以紹開於中興憫  
周室之詩亡四夷未靖笑宋武之字大八法不傳故於  
游戲筆墨之間不忘恢復境土之事憐臣衰鈍責此寵  
休臣謹當襲藏私門傳寶來裔泛洪源而俟舟楫遠符  
遇主之榮因田獵而選車徒庶裨復古之政

謝賜生日禮物表

中謝

臺饋俯盼特示朝廡之渥詔函薦至誕昭帝眷之優恩  
重命輕感深涕溢 伏念臣家世寒甚資材蔑然叨  
被誤知濫塵近列雖有憂時之志欲罄愚衷曾無經國  
之謀可裨聖畧居慚尸素已勾退閒適及劬勞之辰敢  
拜便蕃之賜載陳懇款上瀆睿明更紓雲漢之章終施  
雨露之澤餘生何幸首路為榮此蓋伏遇皇帝陛下禮  
厚養賢仁深及物憐臣久陪帷幄嘗參預於股肱念臣  
將遠軒墀遂曲全於體貌肆於是日因寵其私臣敢不

仰認至懷堅持素守大恩難報固已媿於初心微軀可  
捐更當期於晚節

謝除職名宮觀表

引分投閒肺肝屢罄蒙恩賜可體貌益加厚饋廩於珍  
祠峻班聯於秘殿撫躬儻倖去國徊徨中謝伏念臣受

生么微振迹疎外親逢堯舜之明主願為稷禹之良臣  
寢被異知遽聞大政任遇極矣報效蔑然懷方隅多故  
之憂未能徇國起丘園獨往之願何忍潔身而臣性本

愚論多迂濶不足陪廟堂之末議何以綴帷幄之近  
聯俯仰而思進退以懼恭惟仁聖保全之賜每在孤危  
顛沛之時用恃殊私冒陳誠懇顧泰安之何敢寧蠱毒  
之是虞祇荷天慈曲從人欲雖到家百里實異榮桑之  
折腰然受粟三鍾殆似支離之攘臂感淪骨髓愧溢面  
顏此蓋伏遇皇帝陛下禮厚使臣仁深恕物察臣愚衷  
斷斷第盡事君之小心憐臣過計拳拳詎喟濟時之大  
畧故全終始之眷以為出處之榮臣敢不追數昨非堅

持晚節鳬鴈來去甫遂江湖之游狗馬死生曷舍蓋惟  
之戀

車駕巡幸平江府起居表

靈旗討罪前薄淮漬清蹕撫師進臨吳會天聲震疊士  
氣奮張中謝竊以彊敵怙衆而憑陵叛臣乘時而僭竊  
禍亂之酷星籥殆踰於十周戡定之難宸算靡忘於一  
日蓄威以俟慮勝而行枕戈而復晉讎人懷此志折箒  
而興漢祚天與其時乃卜盛秋之期大恢前歲之舉師

出以律后來其蘇恭惟皇帝陛下勇智正於萬邦孝悌  
光於四海痛兩宮之未返戀極晨昏憫百姓之無辜憂  
深宵旰茲慰雲霓之望不憚霜露之勞將致中興亟修  
大養邦圖再造克臻九廟之安國步一清自格三靈之  
祐臣頃以弱質叨備近聯輒自去秋屢陳大計謂用兵  
當四面而出恐審敵在一年之間疏牘具存冕旒開納  
雖眷遇之私備至而尸素之媿彌深引分乞身銜恩去  
國訪散人之遺跡已甘終老於丘樊望屬車之後塵猶

記首陪於羈勒第存丹赤早見昇平

轉官許回授與兄謝表

陟岡之念仰徹於聰明出綽之言俯加於眷獎乃回公

渥以遂私情中謝伏念臣一遠天墀十移月籥齒衰攖

疾分宜屏於丘園器溢挺灾誠恐填於溝壑空守不移

之志長懷未報之恩曾謂微勞遽叨殊寵顧事為之彌

稱控避懇而莫諧爰念急難冒陳迫切雨露之澤既霑

被於同根雲漢之章復表揚於異數兄弟感泣父老歎

咨夫何差池有此傲偉茲蓋伏遇皇帝陛下堯舜孝悌文武憂勤賞以懋功圖日新於庶治化惟美俗用風勸於多方是致願私果蒙褒允臣敢不體認德意佩服訓詞白首相依喜益敦手足之愛丹心猶在誓將期頂踵之捐

辭免除同知樞密院事表

寵命驟加方懷震惕愚誠冒貢未賜矜從敢忘犯上之誅更罄由衷之懇中謝伏念臣頃以弱質叨汚近聯驚

歲序之荐更浸妨賢路悼事功之蔑著上負聖知所宜  
養疾於丘園遂請辭榮於廊廟仰繫全度俯佚殘骸豈  
圖仄席之求未忍遺簪之棄召趨宣室之對擢奉露門  
之游一望清光再蒙殊用念進讀清閒之職猶懼濫居  
顧本兵樞要之司詎容虛受上既闢於國體下必致於  
人言伏望皇帝陛下曲軫天慈特回淵聽察臣空疎已  
試之技固自無庸憐臣厄殘既老之身豈能有補追還  
成命別選異才儻忘反汗之嫌必免曠官之悔

謝賜生日禮物表

哀遲無補復玷於近司眷渥有加更叨於蕃錫適丁變  
故尚軫慈憐中謝伏念臣初乏事功久尸榮祿孝養弗

洎劬勞之感何窮恩紀未酬疲曳之軀已老甫及門弧

之旦重慙臺餉之儀兩居其官三拜此賜茲蓋伏遇皇

帝陛下推誠接下隆禮使臣圖任而責成功寵賚以將

厚意致身如此報國云何佩先訓之義方罔敢失墜慕

前修之忠節盍至糜捐

謝除同知樞密院事表

進陪帝學方趨召節之嚴叅秉國樞俄被制綸之渥牢辭弗獲冒處徒慚中謝伏念臣頃以謫能誤膺殊賜擢寘羣賢之右與聞庶政之幾過計拳拳每欲謹後車之戒空言落落豈能濟前箸之籌更拘俎豆之間終昧甲兵之間技乃止此才則使然恐孤負於明時思退休於晚歲敢意寵私之未憇亟從閒外而見收遽傳趣行使朝賜對授以本兵之任贊夫經武之圖然臣已試何功

既老焉用血誠甚瀆汗號莫回雖駕馬十駕之勤非敢  
後也而鉛刀一割之利其可再乎偃僂拜恩趨就列  
此蓋伏遇皇帝陛下堯仁天大湯德日新延攬英雄務  
兼收於羣策恢復境土期盡雪於大讎遂致衰遲亦叨  
圖任臣敢不益勵誠節旁咨智謀依日月之光固難施  
於爝火感風雲之會將少效於秋毫

辭免除知樞密院事表

寵命頻仍已駭聞於朝著愚衷激効遂冒瀆於宸聰載

錫溫言尚稽俞旨 中謝伏念臣夤緣拙直被遇聖神識

本昧於經綸言多涉於迂濶比自召歸惟幄擢贊樞機

執羈勒以從雖與近臣而在列習金革之事則非平日

之所長深懼充員馴致曠職敢謂眷私之渥驟陞等級

之崇併閱三遷甫更兩月蓋大恩稠疊矜遺簪之復收

而小器滿盈思覆餗之當戒縱欲勵捐軀之節詎能忘

誤國之憂承命驚惶撫心戰悼是敢控陳草芥之賤猥

干犯斧鉞之嚴誅伏望皇帝陛下聖度曲全皇明下燭

察臣愚陋之質未有報償憐臣哀病之身弗克負荷亟  
收誤獎博選真賢儻獲就於舊班庶免貽於大戾

謝知樞密院事表

庇官右府靡容坐席之溫出綺中宸遽躡朝班之峻寵  
光沓至感涕交流中謝伏念臣性質滯頑器能淺薄徒  
緣異獎更踐要塗直道難行閨風波之屢變大恩未報  
悼蒲柳之先衰顧忝冒之非宜獲屏藏之為幸比膺召  
節復贊事樞病骨支離愈不勝於策勵聖謀宏遠將焉

副於詢求蚤夜以思進退惟谷豈謂歷時未幾身命已  
加初無尺寸可紀之勞越在二三同列之右聞者甚愕  
心其獨憂既控避之弗諧祇驚慙而罔措此蓋伏遇皇  
帝陛下堯舜孝弟禹湯憂勤至性過人方盡宅憂之制  
沈幾先物不忘復古之圖如臣孱愚亦在推擇臣敢不  
恪思其職勉稱所蒙事君盡忠之心造次於是為國復  
讎之計死生以之庶效涓塵少酬天地

龜谿集卷六

欽定四庫全書

集部  
龜谿集卷八

詳校官左中允臣塘五珠  
主事臣呂雲棟覆勘

總校官編修臣王燕緒

校對官中書臣吳俊

謄錄監生臣楊兆豐

欽定四庫全書

龜谿集卷七

宋 沈與求 撰

奏狀劄子

殿中侍御史乞官觀劄子

臣輒瀝血誠仰干天聽伏念臣素苦心悸之疾每一發動顛仆移時昨任臺察累具奏陳乞以官祠自便俞旨未賜即有省曹之除拳拳愚衷無路自達繼蒙聖恩擢寧言職亟將使指出按獄成涉歷冬春方達行在竊自

惟念孤危小臣初無左右游談之助荐叨獎拔盡出賸  
知欲慕古人知無不言之義明日張膽圖報毫分而臣  
命薄數奇心悸復作感冒風濕脚氣乘之步履既艱志  
意隨落徒以寇在近境日懷憂責未敢引疾自陳今者  
殘寇渡江理無嫌避乃更冒居彈糾之地貪祿養痾上  
負恩私臣實有愧伏望陛下廓日月之照察臣悃誠特  
加憐憫除臣一官觀差遣以休養殘骸不勝大願臣無  
任懇祈迫切之至取進止

辭免除侍御史劄子

臣今月十七日准尚書省劄子奉聖旨除臣侍御史日  
下供職者臣竊惟國朝故事御史府不置大夫則雜端  
實貳丞事日綴朝列例比從臣恩禮既優選任必遴賓  
緣序進則為非宜伏念臣技能素薄齒髮早衰昨蒙獎  
知擢寘臺屬據可言之地當不諱之朝空靡歲時無補  
毫髮明神降罰疾病交攻比方請免卧家力祈閒散遽  
叨除命出處背馳不唯行已之方有所未盡矧復要君

之謗無以自明俾正官邪恐傷國體伏望皇帝陛下特  
回淵慮俯照危衷收還誤恩改授賢哲察臣累牘假以  
真祠上以示朝廷因任之宜下以全臣子去就之節臣  
無任懇祈迫切之至取進止

辭免除除侍御史奏狀

右臣今月初六日準尚書省劄子三省同奉聖旨除臣  
侍御史者聞命震驚罔知所措伏念臣天資蠶愚與世  
多忤昨蒙陛下驟加獎遇擢寘風憲之司曾無幾時徧

塵三院每念大恩難報隨事輒言不敢自為身計終緣  
狂妄自速罪辜陛下委曲保全不忍遐棄美職善郡併  
冒寵除待次一年又蒙紀錄召使入覲甫及行朝亟還  
舊物雖天地父母生成之德周旋覆護豈復及此感涕  
流落不知所從然臣已試無狀方務省循若更冒居何  
以厭服公議伏望聖慈追寢成命庶於愚分少以自安  
臣下情無任祈天懇禱之至謹錄奏聞伏候勅旨

侍御史乞官觀劄子

臣近蒙誤恩收召於罪戾之中再加杖拭復寘舊班仰  
惟天地父母之恩至大至深豈臣糜捐所能報稱重念  
臣孤忠拳拳雖欲自竭而才識鴦暗嘗負失職之憂故  
於見聞之事晝度夜思精神憊耗舊有心氣之疾近又  
發作不免披瀝血誠控告君父欲望聖慈哀憐除臣一  
在外官觀差遣以養哀疾近來傳報賊馬別無動息臣  
之請去可以無嫌況陛下招徠四方搢紳之士布在朝  
列多有賢哲可備耳目之官如臣戇愚曾何足數伏乞

陛下至仁從欲特賜俞音寬假歲時少休閭里儻或他  
日聖恩未棄則臣殫竭犬馬之力尚未為晚臣無任懇  
禱激切惶懼之至取進止

辭免除御史中丞奏狀

右臣伏蒙聖恩除臣御史中丞日下供職者聞命震驚  
罔知所措竊以中執法之任是為三獨坐之聯所以鎮  
肅百僚綱紀萬事侍赤墀而簪筆參陪顧問之榮剡白  
簡而飛章總領彈訶之重不有宿望曷副超除伏念臣

門族寒微性資昏懵徒以頃從末路驟對清光一言偶合於聖聰三院徧叨於親擢天地之恩至大不敢謀身  
螻蟻之生甚微唯知許國中緣狂妄自速罪辜方懷紱  
而返故鄉俄賜環而歸舊列既踰累月何補萬分仰負  
睿知理宜投劾嘗陳危悃意欲祈閒敢圖宸睠之益加  
亟自臺端而躡進臣之自揣實不能勝儻或貪冒寵私  
俯僂拜命則必重增尤累滿溢興災豈唯咷於師言誠  
恐墮於國體伏望陛下特回淵聽追寢誤恩改授真賢

以安素分臣下情無任懇祈迫切之至謹錄奏聞伏候  
勅旨

除御史中丞舉左司員外郎潘良貴自代狀

伏覩某官才周學富行峻識明考治亂之端智略通於  
國體辯邪正之分忠言切於人情出入十年始終一節  
聲稱望實臣所不如舉以代臣實允公議謹錄奏聞伏  
候勅旨

辭免除吏部尚書奏狀

右臣伏准尚書省劄子奉聖旨除臣吏部尚書兼權翰林學士日下供職者聞命震驚罔知所措竊以天官六卿之長銓綜人物地極高華祖宗以來惟是詢求一時碩德宿望之士命使居之故夷夏知名擢紳動色朝廷之上自然尊榮就非其才寧若虛次儻緣恩眷輕以假人公言沸騰必至累國况復兼官翰墨備極政事文章之選尤不可不慎也伏念臣迂愚朴拙一無寸長遭遇聖明誤叨器使待罪言路首尾四年雖有拳拳愛君之

心祇罄孤忠不為身計然智識凡下昧於幾微何補事  
功徒積仇怨仰恃日月之照幽隱必臨直道徑行不避  
讒謗終緣思慮過當血氣衰殘涉秋以來十日九病適  
以迫近防虞之際未敢祈閒遽蒙聖恩橫加庸品超躐  
衆俊併冒寵除在臣之愚豈遑安處況臣少時學為場  
屋之文隨衆覓舉既忝祿仕舊學已忘白簡之詞不拘  
音節尚猶牽彊累日僅乃成章退省荒疎常懷跼蹐今  
復假之禁林之直尤非所堪閣筆含毫何以塞責不免

披瀝血誠仰干君父伏望陛下特軫天慈追還成命除  
臣一在外宮觀差遣俾遂小休以安素分不勝幸甚臣  
卑情無任祈天望聖激切屏營之至謹錄奏聞伏候勅  
旨

辭免兼權翰林學士奏狀

右臣近蒙恩除前件差遣尋具辭免仍乞改除一在外  
宮觀伏奉詔書不允所乞恭讀聖訓感涕交流竊念臣  
舊絲寒素初無寸長曲被神聖之知叨塵耳目之寄雖

盡言不識忌諱每荷包容然孤立不為比周終虞顛覆  
今者誤恩遽及二組兼糾在臣之愚豈克勝任而況搢  
紳留滯之久文籍散亡之餘銓總失宜上下交病使臣  
夙夜殫竭驚塞猶恐不足以辨此一職至於禁林之選  
翰墨是司當此多故之時凡下詔令必欲鬯達聖意感  
動人心自非老於文學之人孰宜居此而臣術業空疎  
語言拙澀文章體製既非素習加以憂深感疾福過挺  
災志氣凋零舊學都廢驅之就職必誤使令不免再瀝

血誠仰于宸造所有銓總之職臣懼再三之瀆不敢更  
具懇辭惟是兼權翰林學士實非微臣所當冒處伏望  
天慈特回淵聽追寢施行不唯於臣愚分得以自安在  
朝廷因任之際捨短用長責其實效不勝幸甚臣無任  
祈天望聖激切屏營之至謹錄奏聞伏候勅旨

除吏部尚書舉左朝奉大夫直龍圖閣辛炳自

代狀

伏覩某官學有淵源行無瑕玷恢闊之畧足以濟時膽

蔚之文足以華國恬靜介潔名重東南舉以代臣實允  
公議謹錄奏聞伏候勅旨

辭免侍讀奏狀

右臣准尚書省劄子奉聖旨除臣兼侍讀者聞命震驚  
罔知所措臣聞傳說告高宗之言曰王人求多聞時惟  
建事學於古訓乃有獲然在帝王之學不在分章摘句  
而已蓋將務廣見聞施之天下之事業仰惟陛下聖學  
高妙超邁前王殆非羣臣所能跂及然猶追用金華之

故事肆開經幄延訪儒臣宜得博通經術深知治體之  
人命之勸讀或能發其所學裨益聖聰以助成中興之  
治伏念臣不學無術自知甚明加又病骨支離憂心憤  
亂昔所僅有廢忘一空中臺峻劇之曹北門親近之職  
叨榮過當慚懼已深今若更冒寵私不自上列紬繹之  
際必玷誤知伏望陛下聖度曲全覆護其短追還成命  
別選英才上以廣陛下愛惜羣下之恩下以盡微臣揣  
量私分之義豈勝幸甚臣無任祈天望聖懇到激切之

至謹錄奏聞伏候勑旨

乞罷除龍圖閣學士荆湖南路安撫使兼知潭

州奏狀

右臣今月八日准尚書省劄子奉聖旨除臣龍圖閣學士充荆湖南路安撫使兼知潭州聞命震驚罔知所措臣竊謂國家多事之際固非臣子惜身之時而况河圖峻職湘潭會府寵命併至於臣甚榮義當馳驅即日引道豈宜自列復有所言然臣有一介拳拳孤危之慮不

敢不控告於君父之前者臣頃自疎遠誤被昧憐亟從  
小官徧歷言路初無左右先容之助盡出聖神特達之  
知故於軍旅之事素非思慮所及比來或聞湖南殘寇  
尚復嘯聚而臣猥以弱材驟當重寄必致敗事萬無可  
疑兼臣自荷擢用以言為職於今累年而臣天資贊愚  
志在展盡每荷天語慰勉許賜保全不避怨仇實恃陛  
下臣猶過慮數丐退閒未替大恩尚嗇其去臣亦累嘗  
奏稟止緣秋冬防虞之日未敢力為妨賢之請而又私

門禍患病骨零丁皆俟初春盡當控訴非臣今日敢為  
此言若冒選除不自量力雖殺臣身何補國事伏望聖  
慈終始哀憐罷臣今來所除職名與一在外官觀使得  
休養疾病儻臣未填溝壑猶冀他日萬一勉彊以報殊  
私冒瀆天聽臣無任祈哀請命激切屏營之至謹錄奏  
聞伏候勑旨

除龍圖閣學士舉左奉議郎莫仲珪自代狀

伏覩某官學問淹該操行純潔望實之美見推士林舉

以代臣實允公議謹錄奏聞伏候勅旨

辭免再除吏部尚書奏狀

右臣今月初六日准尚書省劄子奉聖旨除臣吏部尚書者聞命震驚罔知所措伏念臣資材極陋家世至寒親逢聖明躡寘通顯試之中外顧五技之已窮考其初終念一毫之何補省循涯分孤負恩私理宜投劾以知非否則丐閒而免咎緣臣到郡方此閑時恐涉避事之嫌未敢抗章而請敢意冕旒之眷尚矜簪履之遺亟下

詔除俾司銓總非臣糜殞所克報償便合引述豈宜俟  
駕而臣頃叨已試自揣不能雖尋繹弊端稍加懲艾然  
抵觸仇偶幾致顛隣今復冒居重乖清議况臣血氣素  
弱疾疢交攻儻更貪於寵榮將益挺於災釁不免俯披  
愚悃仰徹聰聞冀軫天慈收還恩命除臣一在外宮觀  
差遣庶公朝當授受之際既曰得宜而微臣處進退之  
間亦為有據干冒天威臣無任戰灼屏營之至謹錄奏

聞伏候勅旨

辭免吏部第二狀

右臣今月十五日准進奉院遞到詔書一道已除臣吏部尚書乘遞馬發來赴行在供職者恭讀訓詞感涕交溢伏念臣草芥微賤無他技能仰蒙陛下憐臣孤直拔於稠人之中徧塵華要併冒寵榮臣徒有拳拳欲報之心而才分所局雖勤何補今者治郡累月未有善狀孤負使令愈懷震惕豈謂天慈曲加記錄召以一節俾歸舊班洪惟生死肉骨之恩雖殞百身曷能稱塞而臣已

試無功加之疾疢嘗具奏陳乞追寢成命改授臣一在外宮觀差遣伏望陛下廓天地之量回日月之明特降睿旨檢會臣前奏施行庶安愚分臣只候向宗厚到本州交割職事迤邐前路聽候指揮瀆犯天威臣無任惶懼戰灼之至謹錄奏聞伏候勅旨

除尚書赴闕奏知狀

右臣蒙恩除吏部尚書仰荷聖慈紀錄感涕橫流緣臣自揣無堪尋具辭免於七月二十四日至平江府界准

進奏院遞到詔書一道不允所乞臣已即時望闕謝恩  
祇受仍迤邐起發前赴行在臣無任感懼激切之至謹  
錄奏聞謹奏

辭免侍讀奏狀

右臣今月初五日承吏部牒已降恩命除臣兼侍讀者  
聞命震驚罔知所措臣竊以祖宗以來開設邇英延見  
儒臣命之講讀豈特取其章分句析考正所疑而已蓋  
將博求多聞宏益治道故凡咨訪之際或及國論之餘

恭惟陛下聖學日躋而有欽明抑畏之盛德清光下臨  
羣臣莫望然猶不廢邇英故事親御便坐下詢承學之  
臣當此艱難其選益重伏念臣少而荒疎老復昏忘退  
自尋索一無寸長頃被簡知侍經帷幄雖荷聖度包蒙  
護其所短而忝冒非據臣猶知之況今衰病日侵舊學  
都廢乃欲追誦所聞以卒金華之業縱不自量必負選  
任伏望聖慈察臣悃愞實非飾詞特賜追還誤恩改授  
英傑庶幾足以仰副陛下緝熙之學而臣之私分亦遂

少安冒犯天威臣無任戰灼之至謹錄奏聞伏候勅旨

除吏部尚書舉度支郎中李元淪自代狀

伏覩某官器質渾厚識慮精深學問有餘而敏於從政操履無玷而嚴於律身舉以代臣實允公議謹錄奏聞  
伏候勅旨

辭免除兼翰林學士劄子

右臣今月二十二日准尚書省劄子奉聖旨除臣兼翰林學士者聞命震驚罔知所措臣伏見侍從之列被旨

兼權他職多矣例不敢輒有辭免者恐涉避事之嫌也  
惟是翰墨之林儒臣高選供奉述作既專代於王言燕  
見諮詢實與聞於國論兼官寓直尤當擇才而臣已試  
無狀不敢再冒恩除輒忘此嫌引義自列重念臣本以  
田野之質學為場屋之文音節疾徐初非素習體製高  
下焉能彊知昨者迫於威命之嚴黾勉兼攝辭氣卑弱  
無以鬯達德意之精微傳播四方誠恐累國矧以連年  
憂患心志凋零口耳所傳盡皆廢忘加又銓衡劇劇曹案

牘填委稍稽撥遣動致煩言夙夜究心猶懼不逮儻或  
冒寵貪榮復兼兩職才力不副曠敗無疑縱蒙陛下保  
全未加誅斥而臣之私分何以自安伏望聖慈察臣所  
瀝悃誠出於迫切特賜追還成命改授能臣庶幾臣之  
短拙獲免自暴實為幸甚干冒天威臣無任戰灼之至  
取進止

辭免除參知政事劄子

臣今月二十八日准尚書省劄子奉聖旨除臣參知政

事日下供職者臣聞天下多事則聖哲馳騁而不足天下無事則庸夫高枕而有餘比自中原震蕩以來天下可謂多事矣陛下焦勞求濟八年于茲更用大臣無論數十終未能仰副聖心迄至于今國勢未振陛下當宁慨然念治愈切宜於是時得瓊瑋卓絕之才以陪輔帷幄則戡定禍亂容或有期如臣庸愚一無可紀蹣寘華近日負尸素之慚今日忽蒙恩除擢叅大政驚懼隕越不知所為儻或冒寵貪榮不自上列顛墮累國所繫非

輕伏望聖慈特回淵慮博求人望改以命之庶幾策慮  
設施必能宏濟艱難以克稱陛下知人之明非獨臣之  
幸實天下幸甚臣冒瀆宸嚴無任惶懼戰灼之至取進  
止

辭免賜金帶劄子

臣今月初七日正謝伏蒙聖恩例賜臣對衣金帶魚袋  
鞍馬緣臣於初六日已蒙聖恩特降中使賜臣毬紋笏  
頭帶魚袋今來儻或更拜匪願之式則是疊冒寵私在

臣愚分不遑安處伏望睿慈將例賜金帶魚袋特行寢  
罷庶遵彝典免致煩言取進止

辭免轉官劄子

臣今月二十三日准尚書省劄子奉聖旨為昨措置防  
秋中外協濟轉一官者聞命隕越若無所容臣竊惟賞  
罰者帝王之至權辭受者臣子之大分賞不以功則何  
以礪世受不以義則何以飭身伏念臣猥以謗能驟膺  
殊眷越先羣俊擢與繁機方成命之始行屬遽音之已

至亟聞聖畫決意親征扈警趨之嚴雖叨奉引參帷幄  
之祕曾乏贊襄賴皇威之奮張致敵師之犇潰凱歌初  
奏褒律肆盼逮及通聯例蒙曲澤退量檄倖益負兢惶  
況陛下既收不戰之功務存謙抑而微臣乃受無功之  
賞竊冒寵榮顧愚分之難安知煩言之必起伏望皇帝  
陛下深仁恤隱獨智察微特寢誤恩俯從私欲豈惟慎  
惜名器以勸羣工庶幾敦尚廉隅以風四海取進止

辭免支賜劄子

臣等叨備政府方陛下親摠六師攘却大敵曾無策畫  
仰贊宸謀迺者蒙恩冒進崇階實深慙懼所有依格合  
得減半支賜正當財用匱乏之際義難祇受欲望聖慈  
特賜寢罷庶於愚分有以自安取進止

與左相等為亢旱乞罷政劄子

臣等伏見天示變異亢陽為災迺五月丙子不雨迄至  
於今越四旬矣在田之稼將欲就槁中心惴慄恐害有  
秋伏惟陛下畏天之威責躬引咎精意禱祈無所不至

而星象昭回甘澤未應良由臣等叨冒近司輔政無狀致斯譴告仰貽聖憂伏望陛下特降威命正臣等之罪早賜黜責庶幾上答天心召來和氣以副雲霓之望臣等無任激切之至取進止

再與左相等乞罷政劄子

臣等比以旱暵之災乞解機政以答天戒伏蒙聖恩特頒宸翰開諭至意及降中使宣押臣等各赴都堂治事仰荷慈憐伏增感涕臣等竊以變理陰陽寅亮天地在

古屬公孤之官於今為宰輔之職苟或政理之間不傷和氣則雨暘時若自格豐登迺中夏以來亢陽如此水泉將涸禾稼向枯陛下畏天恤民憂形玉色禱祈備至嘉澤尚愆此實臣等才識暗劣孤負委任所為繆盪致傷天地陰陽之和厥罰常暘咎證可考儻不明正臣等之罪亟加罷黜則何以上弭天變下塞人言伏望聖慈早降威命施行臣無任跼蹐屏營之至取進止

乞外任宮觀劄子

臣比以叨冒近司衰病無補嘗瀝懇誠仰干天聽乞除  
臣一在外官觀伏蒙聖慈特降中使宣押臣赴都堂治  
事仰荷恩憐不勝感涕伏念臣才質駑下本無他長誤  
蒙聖知寘之惟幄每懼無以報稱夙夜兢慙豈敢懷安  
妄為去就誠見陛下英武大度慨然有興衰撥亂之志  
宜得當世豪傑預聞國論相與協贊以圖事功如臣之  
愚久試無狀尚復頑然坐尸榮祿素餐之罪其何可逃  
加以心氣發動智識昏逾儻不自量顛隣必矣伏望聖

慈察臣悃愞特賜矜從除臣一在外宮觀俾遂休養他日疾病少間則捐軀之期似亦未晚臣無任懇到迫切之至取進止

謝賜鍍金銀鞍轡奏知劄子

臣前日伏蒙聖恩特降中使賜臣繡鸞鍍金銀鞍轡一副異數光華度越近比豈臣碌碌無補之人所能稱塞仰惟天地父母之恩愈加難報感涕縱橫臣近為背上忽生一癧跨涉旬餘腫痛不止因服疎利之藥臟腑不

安見請朝假一兩日將理緣此尚稽入謝臣無任惶懼之至謹具奏知

謝賜御書車攻詩劄子

臣近蒙聖恩賜臣御書車攻詩今又蒙陛下以臣草芥賤名特紓宸翰俾獲刻于車攻篇末託於不朽奎鈞爛然光動心目臣之榮幸殆絕一時自顧么微豈能稱塞拜賜之際感涕交頤仰惟陛下方修復古之政以圖撥亂之功而臣猥以空疎待罪近列策慮無取宜在譴訶

拜此殊私以慙以懼惟是畢命夙宵以贊中興之業則  
臣之志也何敢言報臣無任感天荷聖激切屏營之至  
謹具劄子奉謝以聞謹奏

乞出劄子

臣累日見都督府關取空名告勅宣劄等以萬數計臣  
固疑其有所為以問趙鼎張浚而鼎等不以告也臣亦  
曾兩次留身奏稟恢復之事不可一日忘第須審度形  
勢措置得宜一舉成功乃無後悔今日忽見張浚傳奉

聖旨浚有川陝荆襄之行此用兵之謀固已素定臣初不以進取為非而區區過計謂宜審而後行今遣宰臣之出此大議論也臣叨備帷幄乃不預聞蓋臣智識昏邇不足謀國坐尸榮祿實不自安伏望聖慈除臣一在外宮觀差遣以安愚分他日未填溝壑尚能糜殞以報聖恩臣無任瀝懇祈哀之至取進止

乞出第二劄子

臣今早曾具劄子以臣智識昏邇不足謀國遂瀝懑誠

仰干天聽乞一在外宮觀差遣伏蒙聖慈特頒宸翰批  
降處分丁寧委曲仰惟天地父母之恩至深至厚非臣  
糜殞所能稱塞重念臣猥以一介庸陋之資遭遇聖明  
越先羣俊拔擢至此曾未有絲髮之功以報陛下何敢  
數為去就自干犯上之誅顧於朝廷大議多不預聞此  
必有以疑臣者而臣雖有憂國之心動成嫌間尸位素  
餐每深慚負彊顏就列實不遑安臣見家居待命未敢  
隨班奏事伏望聖慈曲垂矜憫俾臣退就外祠少養疾

病他日陛下儻賜記憐則捐軀之期似或未晚臣無任  
懼懇祈哀之至取進止

乞出第三劄子

臣比嘗兩具奏劄乞一在外宮觀差遣伏蒙聖慈宣諭  
丁寧仰荷恩私不勝感涕然臣有區區之愚不免干犯  
斧鉞再控危誠重念臣智術空疎材力縲弱叨侍帷幄  
無所裨補夙夜震懼不遑安息豈不知同力一心共贊  
恢復必不以進取為非第欲審而後動耳而臣前日初

不聞其曲折遂有奏陳若誠即有所為則是臣暗於事  
機謀議抵牾若猶未也則是臣實失於輕信致有憂疑  
況二相之外惟臣參預機務有大舉措每以不知其詳  
而憂疑抵牾豈可復陪國論伏望天慈特加矜憫俾臣  
解罷機務退就外祠少養疾病尚圖他日必有捐軀之  
所臣無任懇祈迫切之至取進止

辭免賜生日禮物劄子

臣伏蒙聖慈以臣生日特降中使賜臣詔書一道并羊

酒米麪者使華脫鞅君使塞塗恩紀便蕃感涕流落伏  
念臣起家寒苦遭世艱危微軀未捐已愧移忠之訓寵  
賚所及更叨將意之儀豈伊犬馬之生能報雲天之施  
而臣濫陪帷幄茂著事功既瀝懇於軒墀行投閒於里  
巷跼蹐俟命當解繁機周旋拜恩殆非故事仰祈睿照  
特軫慈憐覆護孤蹤追寢異數庶全授受之分用為去  
就之宜所有生日禮物臣不敢祇受臣無任祈天荷聖  
激切屏營之至謹具劄子奏聞伏取進止

乞出第四劄子

臣昨以庸陋誤被聖知越先英豪擢寘近列適當前歲  
寇犯淮墳扈蹕總師前臨大敵荷陛下眷遇之深凡帷  
幄密議皆獲纖悉與聞臣亦思所奮勵圖報萬一而愚  
慮無補夙夜不敢自安又敵騎遁逃之後事歸督府凡  
有謀議雖胥吏輩往往皆知而臣職在叅陪國論每獨  
不知臣以此益自愧懼累嘗瀝懇丐閒陛下眷留未容  
臣去輒復奏陳恢復大畧區區愚忠本圖協濟不謂張

浚過有嫌疑動輒相外前日浚倉遽而來人情驚訝以謂相臣動靜必不苟然奔赴闕庭當有大議臣既未以罪去理合商量委曲詢之貌不告語及臣留身具奏曲折方聞玉音宣諭今日措置畧如卿初言臣仰蒙陛下待以腹心終始如一聖恩深厚感極涕零豈不懷戀軒墀誓殫犬馬之力然今事之舉動繫國安危而臣乃不得與聞自古未有此比豈敢含糊在列欲望聖慈特賜矜憫除臣一在外官觀差遣以安愚分臣無任懼懇哀

祈之至取進止

乞出第五劄子

臣以前日相臣倉遽而來中外驚訝以謂隣詣闕庭必有非常之議而臣叩侍帷幄又復不獲與聞夙夜懷慚俯仰跼蹐遂披誠悃上瀆宸聰乞解繁機退安散地伏蒙聖慈特降中使宣押隨班奏事及赴都堂治事仰荷聖恩曲全體貌雖臣糜殞豈足報償再念臣自被親除至參大政數陳恢復之畧本有協濟之心而臣才力弗

彊智數無取惟主知之獨厚顧寧論之莫聞服在股肱愧形面目雖艱難之際敢懷靜退以安身然幾微之間恐以猜嫌而累國不免再殫危懇冒犯天威欲望特賜矜憐檢會臣前奏除一在外宮觀差遣庶全孤節尚勵後圖臣無任祈天望聖激切屏營之至取進止

乞出第六劄子

臣比者荐輸危悃冒犯宸嚴乞解政機除一在外宮觀差遣伏蒙聖慈再降中使宣押赴都堂治事恩眷優渥

不替初終報効莫從唯知隕涕伏念臣頃繇孤遠遭遇聖  
明感於知憐思所奮勵常謂議和避地恐成微弱之形  
積粟練兵審圖恢拓之計念芻言之曲折荷天語之襄  
嘉志在必成期於協濟而臣終緣拙直動致忌嫌適偶  
相臣犇赴行闕惟是人情訝懼之際莫聞國論安危之  
幾名曰參陪實均責任疎外若此尸素何安惟恃保全  
之恩未至顛濟之地俯仰循省夙夜驚慚是以不避瀆  
煩備陳覲縷仰祈睿聽曲賜矜憐授以官祠投之散地

庶欲全於國體豈敢恤於身謀拳拳愚忠莫盡於此臣無任祈天望聖激切屏營之至取進止

乞出第七劄子

臣比瀝血誠冒塵天聽乞解機務退就祠宮伏蒙聖恩曲全體貌使華宣押于再于三待遇優隆始終如一感深淪骨涕淚交流伏念臣立身竒孤賦性惄直仰恃主眷自信不疑而臣識慮不足以察人情之微謀謨不足以陪國論之末數陳恢復之略本有協濟之心嫌間既

萌齟齬難合惟是乞身而去茲乃昔賢之規伏望睿慈  
特賜矜憫亟從私欲免累誤知則臣未死之年皆是捐  
軀之日臣無任祈天望聖激切屏營之至取進止

乞出第八劄子

臣伏蒙聖恩以臣乞解機務退就祠官賜臣詔書不允  
者需奏瀆煩累陳危悃璽書慰勉尚竇俞音伏讀訓詞  
惟知感涕竊念臣以一介無庸之質荷萬乘非常之知  
孤立於朝自信所學每欲同寅而許國第知直道以事

君顧愚忠之不移宜此身之必去盍歸畝畝難戀軒墀  
彌切拳拳之心匪萌傲偉之意仰祈睿鑒曲軫慈憐終  
賜保全亟降處分庶存去就不負生成臣無任祈天望  
聖激切屏營之至取進止

龜谿集卷七